

李白诗全集(四)

[唐]李白 著

辽宁电子图书有限责任公司

李白诗全集(四)

[唐]李白 著

辽宁电子图书有限责任公司

2003年3月第28版

开本:850×1168毫米 1/32 字数:150千字

ISBN L-0000-01568/ I222.742 定价:15.00 元

目 录

卷十九（古近体诗六十首）	2
卷二十（古近体诗三十六首）	35
卷二十一（古近体诗五十八首）	57
卷二十二（古近体诗四十七首）	87
卷二十三（古近体诗六十三首）	112
卷二十四（古近体诗八十八首）	147
卷二十五（补遗）	185

卷十九

古近体诗六十首

游南阳白水登石激作

朝涉白水源。
暂与人俗疏。
岛屿佳镜色。
江天涵清虚。
目送去海云。
心闲游川鱼。
长歌尽落日。
乘月归田庐。

游南阳清泠泉

惜彼落日暮。
爱此寒泉清。
西辉逐流水。
荡漾游子情。
空歌望云月。
曲尽长松声。

寻鲁城北范居士失道落苍耳中见范置酒摘苍耳作

雁度秋色远。
日静无云时。
客心不自得。
浩漫将何之。
忽忆范野人。
闲园养幽姿。

茫然起逸兴。
但恐行来迟。
城壕失往路。
马首迷荒陂。
不惜翠云裘。
遂为苍耳欺。
入门且一笑。
把臂君为谁。
酒客爱秋蔬。
山盘荐霜梨。
他筵不下箸。
此席忘朝饥。
酸枣垂北郭。
寒瓜蔓东篱。
还倾四五酌。
自咏猛虎词。
近作十日欢。
远为千载期。
风流自簸荡。
谑浪偏相宜。
酣来上马去。
却笑高阳池。

东鲁门泛舟二首

其一

日落沙明天倒开。
波摇石动水潏洄。
轻舟泛月寻溪转。
疑是山阴雪后来。

其二

水作青龙盘石堤。
桃花夹岸鲁门西。
若教月下乘舟去。

何啻风流到剡溪。

秋猎孟诸夜归置酒单父东楼观妓

倾晖速短炬。
走海无停川。
冀餐圆丘草。
欲以还颓年。
此事不可得。
微生若浮烟。
骏发跨名驹。
雕弓控鸣弦。
鹰豪鲁草白。
狐兔多肥鲜。
邀遮相驰逐。
遂出城东田。
一扫四野空。
喧呼鞍马前。
归来献所获。
炮炙宜霜天。
出舞两美人。
飘摇若云仙。
留欢不知疲。
清晓方来旋。

游泰山六首（一作天宝元年四月从故御道上泰山）

其一

四月上泰山。
石屏御道开。（屏一作平）
六龙过万壑。
涧谷随萦回。
马迹绕碧峰。
于今满青苔。
飞流洒绝巘。

水急松声哀。
北眺鶚嶂奇。
倾崖向东摧。
洞门闭石扇。
地底兴云雷。
登高望蓬瀛。
想象金银台。
天门一长啸。
万里清风来。
玉女四五人。
飘摇下九垓。
含笑引素手。
遗我流霞杯。
稽首再拜之。
自愧非仙才。
旷然小宇宙。
弃世何悠哉。

其二

清晓骑白鹿。
直上天门山。
山际逢羽人。
方瞳好容颜。
扪萝欲就语。
却掩青云关。
遗我鸟迹书。
飘然落岩间。
其字乃上古。
读之了不闲。
感此三叹息。
从师方未还。

其三

平明登日观。
举手开云关。
精神四飞扬。

如出天地间。
黄河从西来。
窈窕入远山。
凭崖览八极。（览一作揽）
目尽长空闲。
偶然值青童。
绿发双云鬟。
笑我晚学仙。
蹉跎凋朱颜。
踌躇忽不见。
浩荡难追攀。

其四

清斋三千日。（千一作十）
裂素写道经。
吟诵有所得。
众神卫我形。
云行信长风。
飒若羽翼生。
攀崖上日观。
伏槛窥东溟。
海色动远山。
天鸡已先鸣。
银台出倒景。
白浪翻长鲸。
安得不死药。
高飞向蓬瀛。

其五

日观东北倾。
两崖夹双石。
海水落眼前。
天光遥空碧。（遥一作摇）
千峰争攒聚。
万壑绝凌历。
缅彼鹤上仙。

去无云中迹。
长松入云汉。（云一作霄）
远望不盈尺。
山花异人间。
五月雪中白。
终当遇安期。
于此炼玉液。

其六

朝饮王母池。
暝投天门关。
独抱绿绮琴。
夜行青山间。
山明月露白。
夜静松风歇。
仙人游碧峰。
处处笙歌发。
寂静娱清晖。（静一作听）
玉真连翠微。
想象鸾凤舞。
飘摇龙虎衣。
扪天摘匏瓜。
恍惚不忆归。
举手弄清浅。
误攀织女机。
明晨坐相失。
但见五云飞。

秋夜与刘瓘山泛宴喜亭池

明宰试舟楫。
张灯宴华池。
文招梁苑客。
歌动郢中儿。
月色望不尽。
空天交相宜。

令人欲泛海。
只待长风吹。

携妓登梁王栖霞山孟氏桃园中

碧草已满地。
柳与梅争春。
谢公自有东山妓。
金屏笑坐如花人。
今日非昨日。
明日还复来。
白发对绿酒。
强歌心已摧。
君不见梁王池上月。
昔照梁王樽酒中。
梁王已去明月在。
黄鹂愁醉啼春风。
分明感激眼前事。
莫惜醉卧桃园东。

与从侄杭州刺史良游天竺寺

挂席凌蓬丘。
观涛憩樟楼。
三山动逸兴。
五马同遨游。
天竺森在眼。
松风飒惊秋。
览云测变化。
弄水穷清幽。
叠嶂隔遥海。
当轩写归流。
诗成傲云月。
佳趣满吴洲。

同友人舟行游台越作

楚臣伤江枫。
谢客拾海月。
怀沙去潇湘。
挂席泛溟渤。
蹇予访前迹。
独往造穷发。
古人不可攀。
去若浮云没。
愿言弄倒景。
从此炼真骨。
华顶窥绝溟。
蓬壶望超忽。
不知青春度。
但怪绿芳歇。
空持钓鳌心。
从此谢魏阙。

下终南山过斛斯山人宿置酒

暮从碧山下。
山月随人归。
却顾所来径。
苍苍横翠微。
相携及田家。
童稚开荆扉。
绿竹入幽径。
青萝拂行衣。
欢言得所憩。
美酒聊共挥。
长歌吟松风。
曲尽河星稀。（河星一作星河）
我醉君复乐。
陶然共忘机。

朝下过卢郎中叙旧游

君登金华省。
我入银台门。
幸遇圣明主。（遇一作逢）
俱承云雨恩。
复此休浣时。
闲为畴昔言。
却话山海事。
宛然林壑存。
明湖思晓月。
叠嶂忆清猿。
何由返初服。
田野醉芳樽。

侍从游宿温泉宫作

羽林十二将。
罗列应星文。
霜仗悬秋月。
霓旌卷夜云。
严更千户肃。
清乐九天闻。
日出瞻佳气。
葱葱绕圣君。

邯郸南亭观妓

歌鼓燕赵儿。（鼓一作妓）
魏姝弄鸣丝。
粉色艳日彩。（日一作月）
舞袖拂花枝。（袖一作衫）
把酒顾美人。
请歌邯郸词。
清筝何缭绕。
度曲绿云垂。

平原君安在。
蝌蚪生古池。
座客三千人。
于今知有谁。
我辈不作乐。
但为後代悲。

春日游罗敷潭

行歌入谷口。
路尽无人迹。
攀崖度绝壑。
弄水寻回溪。
云从石上起。
客到花间迷。
淹留未尽兴。
日落群峰西。

春陪商州裴使君游石娥溪 时欲东游遂有此赠

裴公有仙标。
拔俗数千丈。
澹荡沧洲云。
飘摇紫霞想。
剖竹商洛间。
政成心已闲。
萧条出世表。
冥寂闭玄关。
我来属芳节。
解榻时相悦。
褰帟对云峰。
扬袂指松雪。
暂出东城边。
遂游西岩前。
横天耸翠壁。
喷壑鸣红泉。

寻幽殊未歇。
爱此春光发。
溪旁饶名花。
石上有好月。
命驾归去来。
露华生翠苔。（翠一作绿）
淹留惜将晚。
复听清猿哀。
清猿断人肠。
游子思故乡。
明发首东路。
此欢焉可忘。

陪从祖济南太守泛鹊山湖三首

其一

初谓鹊山近。
宁知湖水遥。
此行殊访戴。
自可缓归桡。

其二

湖阔数十里。
湖光摇碧山。
湖西正有月。
独送李膺还。

其三

水入北湖去。
舟从南浦回。
遥看鹊山转。
却似送人来。

春日陪杨江宁及诸官宴北湖感古作

昔闻颜光禄。
攀龙宴京湖。（京一作重，一作明）
楼船入天镜。
帐殿开云衢。
君王歌大风。
如乐丰沛都。
延年献佳作。
邈与诗人俱。
我来不及此。
独立钟山孤。
杨宰穆清风。（风一作飏）
芳声腾海隅。
英僚满四座。
粲若琼林敷。
鹄首弄倒景。
蛾眉缀明珠。
新弦采梨园。（采一作来）
古舞娇吴歊。
曲度绕云汉。（云一作清）
听者皆欢娱。
鸡栖何嘈嘈。
沿月沸笙竽。（沿一作江）
古之帝宫苑。
今乃人樵苏。
感此劝一觴。
愿君覆瓢壶。
荣盛当作乐。（荣盛一作盛时）
无令後贤吁。

宴郑参卿山池

尔恐碧草晚。
我畏朱颜移。
愁看杨花飞。

置酒正相宜。
歌声送落日。
舞影回清池。
今夕不尽杯。
留欢更邀谁。

游谢氏山亭

沦老卧江海。
再欢天地清。
病闲久寂寞。
岁物徒芬荣。
借君西池游。
聊以散我情。
扫雪松下去。
扪萝石道行。
谢公池塘上。
春草飒已生。
花枝拂人来。
山鸟向我鸣。
田家有美酒。
落日与之倾。
醉罢弄归月。
遥欣稚子迎。

把酒问月 故人贾淳令予问之

青天有月来几时。
我今停杯一问之。
人攀明月不可得。
月行却与人相随。
皎如飞镜临丹阙。
绿烟灭尽清辉发。
但见宵从海上来。
宁知晓向云间没。
白兔捣药秋复春。

嫦娥孤栖与谁邻。
今人不见古时月。
今月曾经照古人。
古人今人若流水。
共看明月皆如此。
唯愿当歌对酒时。
月光长照金樽里。

同族侄评事黯游昌禅师山池二首

其一

远公爱康乐。
为我开禅关。
萧然松石下。
何异清凉山。
花将色不染。
水与心俱闲。
一坐度小劫。
观空天地间。

其二

客来花雨际。
秋水落金池。
片石寒青锦。
疏杨挂绿丝。
高僧拂玉柄。
童子献霜梨。
惜去爱佳景。
烟萝欲暝时。

金陵凤凰台置酒

置酒延落景。
金陵凤凰台。